

漢丞相諸葛忠武侯集卷之十一

傳

別傳

諸葛亮字孔明瑯琊陽都人蚤孤從父玄依劉表亮從玄來荊州玄死遂家於南陽隆中幼與潁川徐庶元直及石廣元孟公威遊學三人務爲精熟亮獨觀其大畧每晨夜從容抱膝長嘯而謂三子曰卿等可至郡守刺史問其所志但笑而不言公威念鄉欲還亮曰中國饒士大夫遨遊何必故鄉耶稍長躬耕隴畝好爲梁父吟時人莫測也惟與庶及博陵崔州平友善而重龐德公每獨拜牀下德公亦稱之爲臥龍河南名士黃承彥謂

道藏輯要

忠武侯集
傳

三

星集四
八四八

亮聞君擇婦身有醜女才堪相配亮許卽載送之諺曰莫學孔明擇婦正得阿承醜女建安十二年左將軍豫州牧劉玄德來荊州訪世事於襄陽司馬德操德操曰腐儒俗士豈識時務識時務者在俊傑此間自有伏龍鳳雛問爲誰曰諸葛孔明龐士元也及屯新野徐庶見左將軍器之庶曰諸葛孔明者臥龍也將軍豈願見之乎曰君與俱來庶曰此人可就見不可屈致將軍宜枉駕顧之遂詣亮凡三往乃見因屏人曰漢室傾頽奸臣竊命主上蒙塵孤不度德量力欲信大義於天下而智識淺短遂用猖獗至於今日然志則不已君謂計將安出亮曰自董卓以來豪傑竝起跨州連郡者不可勝數曹操比於袁紹則名微

而眾寡然操遂能克紹以弱爲強非惟天時抑亦人謀也今操擁百萬之眾挾天子而令諸侯此誠不可與爭鋒孫權據有江東已歷三世國險民附賢能爲之用此可與爲援而不可圖也荆州北據漢沔利盡南海東連吳會西通巴蜀此用武之國而其主不能守此殆天所以資將軍將軍豈有意乎益州險塞沃野千里天府之土高祖由之成帝業劉璋闇弱張魯在北民殷國富而不知存恤智能之士思得明君將軍旣帝室之胃信義著於四海總攬英雄思賢如渴若跨有荆益保其巖阻西和諸戎南撫蠻越外結好孫權內修政理天下有變則命一上將將荆州之軍以向宛洛將軍身率益州之眾出於秦川百姓孰不

道藏輯要

忠武侯集
傳

三

星集四
又久也

單食壺漿以迎將軍者乎誠如是則王業可成漢室可興矣左將軍曰善於是與亮情好日密關羽張飛等不悅左將軍曰孤有孔明猶魚之有水也願諸君勿復言亮時年二十七劉表愛少子琮長子琦不自安問亮以計亮不對他日獨與升高樓撤梯而後問之亮曰君不見申生在內而危重耳在外而安乎琦感悟求出守江夏明年表卒琮立會曹操南侵琮遣使迎降而不以告操兵至宛左將軍始聞之亮說曰攻琮荆州可有也左將軍不忍乃引去荆人多歸之眾至十餘萬操引精騎急追及於長坂左將軍棄妻子獨與亮等數十騎走至夏口亮曰事急矣請奉命求救於孫將軍時權擁兵柴桑觀望成敗亮說權曰

海內大亂將軍起兵據有江東劉豫州亦收眾漢南與曹操共
爭天下今操芟夷大難畧已平矣遂破荊州威震四海英雄無
所用武故豫州遁逃至此將軍量力而處之若能以吳越之眾
與中國抗衡不如早與之絕若不能當何不按兵束甲北面而
事之今將軍外託服從之名而內懷猶豫之計事急而不斷禍
至無日矣權曰苟如君言劉豫州何不遂事之乎亮曰田橫齊
之壯士耳猶守義不辱况劉豫州王室之胃英才蓋世眾士仰
慕若水之歸海事之不濟此乃天也安能復爲之下乎權勃然
曰吾不能舉全吳之地十萬之眾受制於人吾計決矣非劉豫
州莫可以當曹操者然豫州新敗之後安能抗此難乎亮曰豫

道藏輯要

忠武侯集
傳

辛

星集四
又又

州軍雖敗於長坂今戰士還者及關羽水軍精甲萬人劉琦合
江夏戰士亦不下萬人曹操之眾遠來疲弊聞追豫州一日夜
行三百餘里此所謂強弩之末勢不能穿魯縞也故兵法忌之
曰必蹶上將且北方之人不習水戰又荊州之民附操者逼兵
勢耳非心服也將軍誠能命猛將統兵數萬與豫州協規同力
破操軍必矣操軍破必北還如此則荆吳之勢強鼎足之形成
成敗之機在於今日權大悅即遣周瑜程普魯肅等水軍三萬
隨亮詣左將軍併力拒操遂破操於赤壁左將軍南征收江南
以亮爲軍師中郎將使督零陵桂陽長沙三郡調賦稅以充軍
實羣下推左將軍爲荊州牧治公安孫權來請結好左將軍欲

往見之亮以爲不可左將軍固往至則周瑜果請留之權不從
左將軍既歸嘆曰天下智謀之士所見畧同如此十六年益州
牧劉璋遣法正迎左將軍亮關羽等留守荆璋命左將軍擊張
魯十七年返兵擊璋十八年圍雒亮與張飛趙雲等泝江定白
帝江州江陽十九年與左將軍會圍成都成都平左將軍領益
州牧以亮爲軍師將軍署左將軍府事於是竝用羣才凡劉璋
所嘗授任及其婚姻與所排擯忌恨悉別其器能處以顯任有
志之士無不競勸亮佐益州政尙嚴法正謂亮曰高祖入關約
法三章秦民知德宜緩刑弛禁以慰新附亮曰秦政苛急天下
土崩高祖因之可以弘濟劉璋闇弱自焉以來文法羈縻互相

道藏輯要

忠武侯集
傳

三

星集四
八文也

承奉德政不舉威刑不肅蜀土人士專權自恣君臣之道漸以
陵替寵之以位位極則賤順之以恩恩竭則慢所以致弊實由
於此吾今威之以法法行則知恩限之以爵爵加則知榮榮恩
竝濟上下有節爲治之要於斯著矣左將軍領兵向漢中亮鎮
守成都足食足兵左將軍嘗急調兵亮以問蜀部從事楊洪洪
曰漢中益之咽喉今日之事男子當戰女子當運發兵何疑亮
乃表洪爲蜀郡太守調度皆辦亮用人惟其才能不論資歷先
後洪初爲李平功曹及平遷犍爲守洪已爲蜀郡洪門下書佐
何祗有才智舉郡吏數年拔守廣漢時洪猶在蜀郡也西土皆
服亮能盡時人器用類如此二十一年曹操爲魏王二十二年

操建天子旌旗出警入蹕二十四年左將軍敗操兵於漢中亮帥羣下上左將軍爲漢中主表聞漢帝時孫權稱藩於操遂襲殺關羽取荊州二十五年亮勸漢中王誅劉封封本寇氏之子王至荊州以未有繼嗣育而子之後與孟達守上庸關羽呼封達自助不肯往後與達忿爭達叛降魏封破敗還成都亮以封凶猛易世之後終難制御故勸王正其罪而誅之是歲冬曹丕篡立改元黃初明年傳聞漢帝被弑漢中王發喪制服羣下請稱尊號王未許亮曰曹氏篡漢天下無主大王劉氏苗裔紹世而起乃其宜也王從之夏四月丙午卽皇帝位改元章武以亮爲丞相錄尚書事假節策曰朕遭家不造奉天大統兢兢業業

道藏輯要

忠武侯集傳

三

星集四
又文

不敢康甯思靖百姓懼未能緩於戲丞相亮其悉朕意無怠輔朕之闕助宣重光以昭明天下君其勗哉於是置百官立宗廟祫祭高皇帝以下皆亮實左右之是歲秋帝忿關羽之敗帥諸軍伐吳以報怨亮留守成都明年春亮聞帝兵敗還永安嘆曰使法孝直在必能諫上不東行也帝不豫二年春召亮會永安亮至永安四月病篤謂亮曰君才十倍曹丕必能安國終定大事嗣子可輔輔之如其不才君可自取亮涕泣曰臣敢不竭股肱之力效忠貞之節繼之以死又爲詔戒勅其子且曰汝與丞相從事事之如父帝崩亮得遺詔太子卽位於成都改元建興封亮武鄉侯領益州牧事無巨細皆決於亮亮發教羣下曰夫

參署者集眾思慮廣忠益也若遠小嫌難相違覆曠闕損矣違覆而得中猶棄敝躋而獲珠玉然人心苦不能盡惟徐元直處茲不惑又董幼宰參署七年事有不至至于十反來相啟告苟能慕元直之什一幼宰之殷勤有忠於國則亮可以少過矣又曰初交州平屢聞得失後交元直勤見啟誨前參事於幼宰每言則盡後從事於偉度數有諫止雖姿性鄙暗不能悉納然與此四子終始好合亦足以明其不疑於直言也幼宰名和嘗與亮同署左將軍府事偉度亮主簿胡濟也自昭烈駐永安吳人懼有後圖復來請和會昭烈崩亮方慮恐權有異計尙書鄧芝見亮曰主上幼弱新立宜遣大使往申吳好亮曰吾思之久矣

道藏輯要

忠武侯集傳

三

星集四
×文

未得其人耳今始得之芝問誰亮曰即使君也自遣芝往孫權悅通好如初亮引一時名士如蔣琬張裔等皆入丞相幕府又妙簡舊德使佐益州於是以秦宓爲別駕王梁爲功曹杜微爲主簿誰周爲勸學從事皆行義素著鄉里敬慕之杜微者節尤高自先主定蜀微常稱病聾閉戶不出及亮辟置輦而致之既至力求去亮於座與書曰曹丕篡弒自立是猶土龍芻狗之有名也欲與羣賢因其邪僞以正道滅之丕方大興勞役以向吳楚今因不多務且閉境勸農育養民物竝治甲兵以待其挫然後伐之可使兵不戰民不勞而天下定也君但當以德輔時不責君軍事何爲汲汲求去微乃留亮更薦爲諫議大夫先是益

州郡渠帥雍闓殺太守而附吳吳以闓爲永昌太守永昌功曹
呂凱府丞王伉率吏士閉境拒守闓不能進使郡人孟獲誘扇
諸髡牂牁太守朱褒越雋髡王高定皆應闓亮以新遭大喪亦
撫而未討閉關息民勸農殖穀魏司徒華歆等抵亮諷使稱藩
亮不報書作正議以示人其大畧曰昔世祖創迹舊基奮羸卒
數千摧莽彊旅四十萬於昆陽之郊據道討淫不在眾寡軍誠
曰萬人必死橫行天下昔軒轅氏整卒數萬制四方定海內而
况以數十萬之眾據正道而臨有罪可得而干擬哉三年春始
率眾南征四郡詔賜金鈇鉞一具曲蓋一前後羽葆鼓吹各一
部虎賁六十人亮至南首表呂凱王伉執忠守義拜凱雲南太

道藏輯要

忠武侯集
傳

卷

星集四
×文8

守伉永昌太守竝封亭侯進兵越嶲所在戰捷遂斬雍闓高定
惟孟獲收圍餘眾以拒獲素爲髡漢所服亮募生致之旣得使
觀營陣之間問曰此軍何如獲曰向不知虛實故敗今直易勝
耳亮笑而縱之使更戰七戰七擒而亮猶遣獲獲止不去曰公
天威也南人不復返矣遂至滇池四郡皆平卽其渠帥而用之
或以諫亮亮曰若留外人則當留兵兵留則無所食如夷新傷
破父兄死喪留外人而無兵必生患又蠻累有廢殺之罪自知
釁重留外人終不相信今吾欲不留兵運糧而紀綱粗定蠻漢
粗安不亦可乎迺悉收其豪傑孟獲等以爲官屬出其金銀丹
漆耕牛戰馬以給軍國之用終亮世髡不復反十二月亮還至

成都治戎講武以候大舉方是時田疇辟倉廩實法度修立軍
旅整理工械技巧物究其極吏不容奸人懷自厲疆不侵弱朝
會不譁道不拾遺亦無醉人其餘力所及官府次舍橋梁道路
無不繕理五年三月亮統諸軍將北駐漢中帝下詔曰朕聞天
地之道福仁而禍淫善積者昌惡積者喪古今常數也是以湯
武修德而王桀紂極暴而亡曩者漢祚中微網漏凶慝董卓造
難震蕩京畿曹操階禍竊執天衡內懷無君之心子丕孤豎敢
尋亂階盜據神器更姓改物世濟其凶當此之時皇極幽昧天
下無主則我帝命隕越於下昭烈皇帝體明睿之德光續文武
應乾坤之運出身平難經營四方人鬼同謀百姓與能兆民欣

道藏輯要

忠武侯集
傳

三

星集四
×文8

戴建位易號丕承天序補弊興衰存復祖業誕膺皇綱不墜於
地萬國未靖早世遐殂朕以幼冲繼統鴻基未習保傅之訓而
嬰祖宗之重六和壅否社稷不建永惟所以念在匡救光載前
緒未有攸濟朕甚懼焉是以夙興夜寐不敢自逸每從菲薄以
益國用勸分務稽以阜民財授方任能以參其聽斷私降意以
養將士欲奮劍長驅指討凶逆朱旗未舉而不復殞喪斯所謂
不然我薪而自焚也殘類餘醜又支天禍恣睢河洛阻兵未弭
諸葛丞相弘毅忠壯忘身憂國先帝託以天下以勗朕躬今授
之以旄鉞之重付之以專命之權統領步騎二十萬眾董督元
戎恭行天罰除患甯亂克復舊都在此行也昔項籍總一彊眾

跨州兼土所務者大然卒敗垓下死於東城宗族如焚爲笑千載皆不以義陵上虐下故也今賊效尤天人所怨奉時宜速庶憑炎精祖宗威靈相助之福所向必克吳王孫權同卹灾患潛軍合謀犄角其後涼州諸國王各遣月支康居胡侯支富康植等二十餘人詣受節度大軍北出便欲率將兵馬奮戈先驅天命旣集人事又至師貞勢并必無敵矣夫王者之兵有征無戰尊而且義莫敢抗也故鳴條之役兵不血刃牧野之師商人倒戈今旌麾首路其所經至亦不欲窮兵黷武有能棄邪從正簞食壺漿迎王師者國有常典封寵小大各有品限及魏之宗族枝葉中外有能規利害審順逆之數來詣降者皆原除之昔輔

道藏輯要

忠武侯集
傳

美

星集四
六文

果絕親於智氏而蒙全宗之福此前世之助驗也若其沉迷不返將助亂人不式王命戮及妻孥罔有攸赦廣宣恩威誅其元帥弔其殘民他如詔書律令丞相其露布天下使稱朕意焉亮命張裔參軍蔣琬留統府事辟尹默來敏爲軍祭酒霍戈姚伸等皆入幕府竝進文武之士亮稱之曰忠益者莫大於進人進人者各務其所尚今姚掾並存剛柔以廣文武之用可謂博雅矣願諸掾各舉此事長水校尉廖立見亮舉師對蔣琬等以爲不然且誹謗先帝訾毀眾臣亮奏以爲亂政廢爲庶人徙汶山亮以帝富於春秋忠邪難辨深爲根本至計臨發上疏云云遂行屯於沔陽亮以轉漕回遠使子喬親帥諸將子弟轉運於谷

中孟達既北赴魏有李鴻者降蜀爲亮言叛人王冲見達稱明公切齒於達欲收其妻子者達曰諸葛公見顧有本未必不爾亮復以書遺達令自拔達欲舉新城郡歸蜀亮至漢中欲出兵攻其情會魏司馬懿覺引兵誅達六年正月亮在漢中欲出兵攻魏與羣下謀之丞相司馬魏延曰魏夏侯楙少主婿也怯而無謀願假延精兵五千負糧五千直從褒中出循秦嶺而東當子午而北不過十日可至長安比東方相合聚尙二十許日而公從斜谷來亦足以達如此則一舉而咸陽以西可定也亮以爲不如從坦道平取爲正不用延計揚聲由斜谷取郿使將軍趙雲爲疑兵據箕谷魏遺曹真都督關右軍郿亮身率大軍攻郿道藏輯要

忠武侯集傳

三

星集四

山戎陣整齊號令明肅南安天水安定三郡應亮魏朝恐懼關中響震羣臣莫知計所出魏主叡如長安命將軍張郃督馬步五萬拒亮初越雋太守馬謖才器過人好論軍計亮深加器異及攻南方謖爲亮言攻心爲上卒如其計昭烈臨終謂亮曰馬謖言過其實不可大用亮以爲不然以謖爲參軍每引見談論自晝達夜及出軍祁山謖督諸軍在前與張郃戰於街亭違亮節度舉措煩擾舍水上山不下據城裨將王平連規諫不用遂大爲郃所敗士卒離散獨平將千人自持收合諸營遺棄而還亮屯去謖數里徐行引退拔西縣千餘家歸漢中收謖下獄戮以謝眾爲之流涕自臨祭待其遺孤若平生蔣琬後詣漢中問

亮天下未定戮智計之士豈不惜乎亮流涕曰孫武所以能制勝於天下者用法明也四海分裂兵交方始若復廢法何用討賊邪亮又誅將軍張休李盛奪將軍黃襲等兵是時趙雲等亦敗於箕谷不至重傷貶雲位號旌賞王平加拜參軍統五部進位討寇將軍封亭侯上疏自劾曰臣以弱才叨竊非據親秉旄鉞以厲三軍不能訓章明法臨事而懼至有街亭違命之闕箕谷不戒之失咎皆在臣授任無方臣明不知人卹事多闇春秋責帥臣職是當請自貶三等以督厥咎詔以亮爲右將軍行丞相事所總統如前亮之出師眾纔五萬或勸亮發兵者亮曰大軍在祁山箕谷皆多於賊而不能破賊爲所破者則此病不在

道藏輯要

忠武侯集傳

三

星集四
八五八

兵少也在一人耳今欲減兵省將明罰思過校變通之道於將來若不能然者雖兵多何益自今以後諸有忠慮於國但勤攻吾之闕則事可定賊可死功可躋足而待矣於是考微勞甄壯烈引咎責躬布所失於天下厲兵講武以爲後圖戎士簡練民忘其敗矣亮之出祁山天水功曹姜維降亮以其敏於軍事心存漢室辟爲室掾典軍事平三郡有功封亭侯是歲十一月亮以孫權破曹休魏兵東下上疏云云遂出散關急攻陳倉魏遣曹真救陳倉張郃繼之會亮糧盡引去魏將王雙率騎追亮相與戰破之斬雙七年春亮遣將軍陳式攻武都陰平二郡魏雍州刺史郭淮引兵救之亮次建威淮退遁遂拔二郡蜀人皆

以賀亮亮愀然曰普天之下莫非漢民國家威力未舉使百姓困於豺狼之吻一夫有死皆亮之罪以此相賀能無愧乎詔策亮曰街亭之敗咎由馬謖而君引愆深自貶抑重違君意順聽所守前年耀師馘斬王雙今歲爰征郭淮遁走降集氏羌興復二郡威震凶暴功勳顯然方今天下騷擾元惡未梟君受大任幹國之重而久自抑損非所以光揚洪烈也今復君丞相君其勿辭夏吳孫權僭稱尊號其羣臣以竝尊二帝來告議者以爲交之無益明體弗順宜顯明正義絕其盟好亮獨曰權有僭逆之心久矣國家所以畧其釁情者求掎角之援也今若加顯絕讐我必深便當移兵東戍與之角力須并其土乃議中原彼賢

道藏輯要

忠武侯集
傳

三

星集四
又文也

才尚多將相輯睦未可一朝定也頓兵相持坐而須老使北賊得計非算之上者孝文卑詞匈奴先帝復與吳盟皆應權通變弘思遠益非匹夫之爲分者也今議者咸以權利在鼎足不能并力且志望已滿無上岸之情推此皆似是而非也何者其勢不侔故限江自保權之不能越江猶魏賊之不能渡漢非力有餘而利不取也若大軍致討彼上當分裂其土以爲後規下當畧民廣境示武於內非端坐者也若就其不動而睦於我我之北伐無東顧之憂河南之眾不得盡西此之爲利亦已深矣權僭之罪未宜明也乃遣衛尉陳震往賀權權約中分天下冬亮徙府營於南山下原山築漢城於沔陽築樂城於成固八年夏

魏使大司馬曹真由斜谷率諸將數道竝進大將軍司馬懿沂漢水由西域與真會秋亮次成固赤坂以待之召前將軍李平將兵二萬赴漢中表平子豐爲江州都督典平後事會天大雨月餘棧道斷絕魏主叡令真等引師退亮使司馬魏延西入羌中大破魏將費曜郭淮於陽谿是歲亮遷蔣琬爲長史亮數出外琬在成都常足食足兵以相供給亮每云公琰託志忠雅當與吾共贊王業者九年二月亮復出祁山以木牛流馬及連弩皆亮所制也亮圍祁山招鮮卑軻比能比能至北地石城應亮魏曹真有疾魏主叡謂司馬懿曰西方事重非君莫可付者使西屯長安督張郃費曜戴陵郭淮等以禦之三月懿使曜陵留

道藏輯要

忠武侯集
傳

卑

屋集四
八文八

精兵四千守上邽餘眾悉出救祁山亮分兵留攻而自逆懿於上邽淮曜等邀亮亮破之因大芟其麥與懿遇於上邽東懿斂兵依險兵不敢交亮引還懿隨亮至鹵城又登山掘營不肯戰其下謂懿曰公畏蜀如虎奈天下笑何皆請戰懿病之六月使郃攻無當監何平於南圍自案中道向亮時蜀兵更下者十二魏軍始陣番兵適交參佐俱言賊眾彊盛宜權留更卒張助聲勢亮曰吾統武行師大信爲本得原失信古人所惜更者束裝以待期妻子鶴望而計日雖臨征難義不廢也督遣令行於是去者願留一戰止者憤踊思致死命使魏延高翔吳班與懿戰大破之獲甲首三千級懿走保營六月亮以糧盡退師懿使張

郤襲攻至木門亮與戰又敗之射死郤八月廢中都護李平徙梓潼郡方亮在祁山平掌運事值天霖雨糧運不繼平遣參軍報亮來還亮承以退平聞軍退乃更陽驚曰軍糧饒足何以便歸又表帝謂軍偽退以誘賊亮出其前後手筆書疏本末平頓首謝罪於是亮表平罪惡曰今篡賊未滅社稷多難國事惟和可以克捷不可包含以危大業遂廢徙焉平子豐時爲亮幕府參軍亮與書曰吾與君父子戮力以獎漢室謂至心感動終始可保何圖中乖若都護思負一意君推心從事否可復通逝可復還也平嘗與亮書勸受錫進爵亮報之曰吾本東方下士誤用於先帝位極人臣祿賜百億討賊未効知己未答而方寵齊

道藏輯要

忠武侯集傳

聖

星集四
X X 8

晉坐自貴大豈其義乎若滅魏斬叡帝還故居與諸子並升可也亮自是歲冬以連年出師息民休士益勸農講武運米集斜谷邸閣三年而後用之亮用兵出入如賓踐敵境而芻蕘者不止師止如山進退如風出征之日天下震動而人心不憂雖數萬之眾而所興造若數十萬之功所至營壘井竈園溷藩籬障塞皆應繩墨一月之行去之如始至發教軍事文彩不豔過於丁甯而經事綜物公誠之心形於文墨夙興夜寐罰二十以上皆親省覽亮嘗自按簿書主簿楊顥直入諫以爲疲神碎務亮謝之及顥死爲之泣涕三日十二年二月亮悉大眾十萬由斜谷出始以流馬運遣使約吳同時大舉四月至郿軍於渭水南

據武功五丈原司馬懿渡渭背水爲壘以拒亮亮每患糧運不繼使已志不伸乃分兵屯田爲久駐之基耕者雜於渭濱居民之間而百姓安堵軍無私焉亮數挑戰懿不敢出亮遣遺巾幘懿患之上表請戰魏主叡使辛毗仗節爲軍師以制之亮謂其下曰彼本無戰情所以固請戰者示武於其眾耳將在軍君命有所不受苟能制吾豈千里而請戰耶相持百餘日會秋亮有疾日侵密表帝曰臣若不幸後事宜以付蔣琬時帝亦遣尙書僕射李福省侍因諮以國家大計別去數日復還亮曰知君還意近言語雖彌日有所不盡更來求決耳所問者公琰其宜也福復請亮曰文禕可以繼之又問其次亮不答文禕卽費禕也

道藏輯要

忠武侯集
傳

壘

星集四
八八八

初琬爲廣都長昭烈嘗奄至廣都琬眾事不治且復沉醉昭烈大怒將加戮亮曰琬社稷之器非百里才其爲政以安民爲本不事修飾願加察乃解禕爲黃門侍郎亮南征還羣僚迎謁於數十里外年位多在禕右者而亮獨命禕同載眾皆易觀至是又並稱之後相繼總政事皆稱賢相云八月亮疾病授長史楊儀司馬費禕護軍姜維等退師節度有星墜於營中亮薨年五十四長史楊儀等整軍而出人往告懿懿勒兵追之姜維令儀反旗鳴鼓若將向北者懿復引退不敢逼儀得結陣去入谷而後發哀秦人爲之諺曰死諸葛走生仲達懿按行亮營壘歎曰天下奇才也亮遺命葬漢中定軍山因山爲墳冢足容棺歛以

時服不須器物詔策曰惟君體資文武明睿篤誠受遺託孤匡輔朕躬繼絕興懲志存靖亂爰整六師無歲不征神武赫然威震八荒將建殊功於季漢參伊周之巨勳如何不弔事臨垂克邁疾殞喪朕用傷悼肝心若裂夫崇德序功紀行命謚所以光昭將來刊載不朽今贈君丞相武鄉侯印綬謚君忠武侯初亮自表帝曰成都有桑八百株薄田十五頃子孫衣食自有餘饒至於臣在外任別無調度隨身衣食悉仰於官不別治生以長尺寸若臣死之日不使內有餘帛外有贏財以負陛下訖如其言亮爲相十四年昭烈及後主卽位纔兩赦或言大惜赦者亮曰治世以大德不以小惠若劉景升季玉父子歲歲赦宥何補

道藏輯要

忠武侯集
傳

聖

星集四
六文也

於治亮所廢李平常冀得自補復聞亮薨策後人不能發憤死廖立亦垂涕嘆曰吾終爲左袵矣亮旣沒吏民歌思不忘多請爲亮立廟朝議以禮秩不聽百姓以時節私祭之於道路言事者或以爲可聽立廟成都後主不從步兵校尉習隆等表曰亮德範邇遐勳蓋季世興王室之不壞實斯人是賴而蒸嘗止於私門廟貌闕而莫立使百姓蒼祭戎蠻野祀非所以存德念功述追在昔者也今若盡順民心則瀆而無典建之京師又偏宗廟此聖懷所以爲疑也臣愚以爲宜因近其墓立之於沔陽使所親屬以時祀祭凡其臣故吏欲奉祠者皆限至廟斷其私祀以崇正禮從之時亮薨一十有八年矣亮作八務七戒六恐五

懼皆有條章以訓厲臣子晉著作佐郎陳壽定著亮文集凡二十四篇開府作牧權制計算南征北出綜覈訓厲貴和傳運軍令法檢兵要等皆名篇之目又作八陣圖蓋黃帝太公邱井法人莫曉也亮駕馭諸將曲盡其情昭烈嘗令黃忠爲後將軍亮曰忠名望素非關馬之倫今遽合同列馬超張飛親見其功尙可喻旨羽遙聞之將不悅昭烈不聽頃之策馬爲前將軍羽果大怒曰大丈夫終不與老兵同列費詩說之始拜命魏延楊儀皆小人之難養者且不相能然延驍勇善撫士儀有幹用亮使儀當勞劇延冒險阻皆受命捐軀不敢辭難及亮沒乃舉兵相圖以死亮長史張裔嘗稱亮曰公賞不遺遠罰不阿近爵不可

道藏輯要

忠武侯集
傳

器

星集四
×××

以無功取刑不可以貴勢免此賢愚所以僉忘其身也陳壽評曰亮之爲相國也撫百姓示儀軌約官職從權制開誠心布公道盡忠益時者雖讐必賞犯法怠慢者雖親必罰服罪輸情者雖重必釋游辭巧飾者雖輕必戮善無微而不賞惡無纖而不貶庶事精練物理其本循名責實虛僞不齒經載十二而年名不易軍旅屢興而赦不妄下袁暉稱之曰受六尺之孤攝一國之政事凡庸之君專權而不失禮行君事而國人不疑樊建稱之曰聞惡必改而不矜過賞罰之信足感神明亮子瞻嗣爵